

secours d'argent audit S^r Roy qu'il conviendra employer pour ceste guerre, en si grosse somme que chacun entend assez, en manière que ledit S^r Roy seul ne pourroit bonnement porter si gros faiz à l'occasion des grosses et continuelles armées qu'il luy a esté nécessaire longuement entretenir, et par mer et par terre, pour résister à ses ennemys, de l'excessive rançon qu'on a de luy extorquée pour la délivrance de ses enfans, des fortifications et réparations qu'il fait chacun jour à ses places et villes, de la construction et équippage de galères et autres navires, de l'ordre et payement des gens de pied et de gens qu'il tient en son royaume ordinairement jusques au nombre de deux mil hommes d'armes et cinquante mil hommes de pied, la quantité d'artillerye nouvellement faicte et autres infinies despenses, oultre l'ordinaire entretenement de son estat. A ceste cause, priera et persuadera icelluy de La Foret le G. S. de subvenir au dit S^r Roy, pour convertir à l'effect que dessus, d'ung million d'or, qui ne sera mal aisé audict G. S. pour estre ses affaires constituez en toute félicité et ne lui debvra estre grief ; considérant de quelle importance peult estre d'affoyblir et rabaisser le courage et dessaing du dit Roy des Espaignes, qui n'aspire et ne tend, comme l'on voit, sinon à la monarchie du monde ; en sorte que pour à mesme temps et de tous caustez poursuivre tellement ceste poincte, que l'honneur, proufict et victoire en demeure aux dits G. S. et Roy, sera très expédient, que le dit G. S., oultre le secours d'argent ci-devant mentionné et pendant que le dit S^r Roy par terre exploictera de son causté ses forces, envoie son armée de mer en faisant mesme commandement au S^r Haradin pour courir sus et entrer premièrement en la Sicille et Sardaigne, et y establir pour Roy et Seigneur le personnage que le dit de La Forest a charge de nommer, lequel a credit et intelligences es dites Iles, qu'il pourra tenir et garder à la devotion, et soubz l'ombre et